

CRYNODEB GWEITHREDOL

# Gwella Gyda'n Gilydd Dros Gymru

**Rhaglen Cefnogi Diogelwch mewn Gofal Mamolaeth  
a Newyddenedigol (MatNeoSSP) yng Nghymru**

Adroddiad Cyfnod Darganfod

GORFFENNAF 2023

# Crynodeb gweithredol

Mae'r adroddiad hwn yn archwilio tirwedd gwasanaethau mamolaeth a newyddenedigol yng Nghymru ac roedd yn eang ei gylch gwaith, gan gynnwys safbwyntiau manwl am ddiwylliant gwaith, arweinyddiaeth a dysgu ochr yn ochr â'r gweithlu a mesurau canlyniadau clinigol ar gyfer mamau a babanod ledled y wlad. Mae canfyddiadau'r Cyfnod Darganfod hwn o waith, a gynhaliwyd rhwng mis Rhagfyr 2022 a mis Chwefror 2023, a'r argymhellion yn adlewyrchu'r cwmpas eang hwnnw. Wrth symud ymlaen, mae'n rhaid inni weithio fel un tîm amenedigol, i wella gofal i fenywod a theuluoedd.

Rydym yn croesawu'r gydnabyddiaeth gan Lywodraeth Cymru mai 1,000 diwrnod cyntaf bywyd, o'r cenhedlu hyd at ddwy flwydd oed, yw'r amser mwyaf hanfodol ar gyfer dylanwadu ar ganlyniadau iechyd i unigolion a chenhedloedd. Mae cael pethau'n iawn ar ddechrau bywyd yn sylfaen bwysig ar gyfer iechyd a lles i bob un ohonom yng Nghymru.

Mae'r dull a ddefnyddiwyd gennym yn y gwaith hwn wedi'i wreiddio mewn ymholi gwerthfawrogol a Fframwaith y Sefydliad Gwella Gofal Iechyd ar gyfer Gofal Diogel, Dibynadwy ac Effeithiol. Gwelsom enghreifftiau o arfer da a rhagorol mewn gwasanaethau ledled Cymru a thu hwnt, y gellid eu rhannu a'u ehangu i wella gwasanaethau ledled y wlad.

Nid adolygiad o wasanaethau oedd y gwaith hwn, ond drwy gyfarfod a chyfathrebu â thimau mamolaeth a newyddenedigol, rydym wedi nodi rhai cyfleoedd i wella gofal a llywodraethiant. Gofal diogel a theg yw'r nod ym mhob gwasanaeth, ac mae wedi bod yn galonogol gweld rhai prosiectau gwella rhagorol eisoes ar y gweill.

Mae heriau iechyd cyhoeddus i iechyd a lles teuluoedd yng Nghymru, ac mae rhai ohonynt yn gofyn am waith a fydd y tu allan i gwmpas gofal y GIG. Ni all y GIG yn unig fynd i'r afael â lefelau uchel o ordewdra ac ysmegu, a phocedi o amddifadedd. Fodd bynnag, mae camau y gall ein gwasanaeth iechyd eu cymryd i sicrhau'r canlyniadau gorau posibl i fenywod a babanod.

Mae heriau difrifol o ran y gweithlu hefyd, nad ydynt yn unigryw i Gymru, a fydd yn gofyn am atebion creadigol a buddsoddiad. Ein gweithlu yw sylfaen y gofal a ddarparwn. Mae staffio priodol yn sail i bopeth yr ydym am ei gyflawni ar gyfer menywod a theuluoedd yn ein gofal. Mae lles staff, cymorth i staff a chadw staff yn flaenoriaethau allweddol yn ogystal â recriwtio.

Mae'r blaenoriaethau a nodwyd gennym yn gofyn am gamau gweithredu personol, lleol, rhanbarthol a chenedlaethol – ynghyd â newid systemig, dull cydlynol parhaus o wella, ac arweinyddiaeth gydweithredol gref. Cyflwynir yr adroddiad mewn categorïau sy'n seiliedig ar ddogfen Llywodraeth Cymru: Gofal Mamolaeth yng Nghymru: gweledigaeth 5 mlynedd ar gyfer y dyfodol (2019-2024), gyda blaenoriaethau perthnasol ar gyfer gwella yn yr adrannau hynny. Darperir tabl manwl o'r holl **flaenoriaethau ar gyfer gweithredu** a argymhellir ar ddiwedd yr adroddiad hwn. Mae'r prif flaenoriaethau, y dylid eu gweithredu cyn gynted â phosibl, wedi'u hamlygu mewn gwyrddlas a'u cynnwys yn y crynodeb hwn.

# Blaenoriaethau ar gyfer gweithredu

## 1. Y Gydwethredfa Gofal Diogel

### BLAENORIAETH ALLWEDDOL:

Datblygu Cydwethredfa Gofal Diogel ar gyfer gwasanaethau mamolaeth a newyddenedigol a dwyn ynghyd grwpiau cyfeirio arbenigol sy'n cynnwys clinigwyr, gweithwyr proffesiynol perthynol i iechyd a defnyddwyr gwasanaethau ledled Cymru i ysgogi gwelliannau mewn gofal ar draws y gwasanaeth.

## 2. Arweinyddiaeth

Adnabod a chefnogi arweinyddiaeth gref, dosturiol.

### BLAENORIAETH ALLWEDDOL:

Cynrychiolaeth ar y pwyllgor Ansawdd a Diogelwch ar gyfer y tîm 'cwad' amenedigol, gyda Chyfarwyddwr Bydwreigiaeth, neonatolegydd ymgynghorol ac arweinwyr diogelwch obstetryddion ymgynghorol ac uwch nyrsys newyddenedigol yn cael eu cynrychioli.

### BLAENORIAETH ALLWEDDOL:

Rowndiau cerdded strwythuredig rheolaidd i swyddogion gweithredol.

## 3. Gweithlu

Gwelsom heriau sylweddol ymhlith y gweithlu, gyda thimau dan straen yn sgil bylchau a darpariaeth ad hoc, a oedd yn effeithio ar les, addysg, hyfforddiant, ymchwil a gwasanaethau eraill.

### BLAENORIAETH ALLWEDDOL:

Strategaeth gweithlu sy'n sicrhau'r niferoedd gorau posibl o staff medrus a brwdfrydig ochr yn ochr â modelau gofal newydd yn y gwasanaethau mamolaeth a newyddenedigol.

### BLAENORIAETH ALLWEDDOL:

Dylai GIG Cymru sicrhau y darperir cymorth seicolegol, ym mhob adran famolaeth ac uned newyddenedigol ar gyfer yr holl staff mamolaeth a newyddenedigol.

### BLAENORIAETH ALLWEDDOL:

Cefnogaeth weinyddol ar gyfer gofal clinigol a hyfforddiant staff.

## 4. Gwaith tîm amenedigol

Dylai timau sy'n cydweithio hyfforddi gyda'i gilydd.

Mae PROMPT (Hyfforddiant Amlbroffesiynol Obstetrig Ymarferol) Cymru eisoes yn arwain y ffordd o ran hyfforddiant amlddisgyblaethol i staff mamolaeth.

### BLAENORIAETH ALLWEDDOL:

Mae angen blaenoriaethu amser a lle ar gyfer hyfforddiant.

### BLAENORIAETH ALLWEDDOL:

Dylid cynnwys neonatoleg mewn hyfforddiant amlddisgyblaethol ochr yn ochr â hyfforddiant NLS (Cynnal Bywyd Newyddenedigol) lleol.

## 5. Beichiogrwydd mwy diogel

Bydd cefnogi menywod ag ymyriadau sy'n seiliedig ar dystiolaeth yn sicrhau'r canlyniadau gorau posibl yn ystod beichiogrwydd ac yn lleihau anghydraddoldebau. Mae'n arbennig o bwysig cydnabod a darparu gofal ychwanegol i fenywod â chyflyrau meddygol sy'n bodoli eisoes, cymhlethdodau obstetreg blaenorol, gordewdra ac ysmegu.

### BLAENORIAETH ALLWEDDOL:

Tynnu sylw at ganllawiau cenedlaethol yn ymwneud â beichiogrwydd a genedigaeth ar draws GIG Cymru, gan wella mynediad a lleihau amrywiadau trwy wella ansawdd.

### BLAENORIAETH ALLWEDDOL:

Swyddi bydwreigiaeth o fewn Ymddiriedolaeth Gwasanaethau Ambiwylans Cymru (WAST) ar gyfer cyngor clinigol, gwybodaeth a gweithio mewn partneriaeth. Cefnogi datblygiad gwasanaethau ffôn cenedlaethol 'Llinell Ffôn Esgor' a 'Llinell Ffôn Brysbennu' ac addysg WAST.

### BLAENORIAETH ALLWEDDOL:

Sefydlu Rhwydwaith/Rhwydweithiau Meddygaeth Mamol gan sicrhau penodiad un neu fwy o feddygon obstetreg yng Nghymru.

### BLAENORIAETH ALLWEDDOL:

Adnewyddu ymgyrch Beichiogrwydd Mwy Diogel GIG Cymru sy'n ymgorffori camau gweithredu o fersiwn 3 o Bwndel Gofal Achub Bywydau Babanod. Bydd hyn yn gofyn am ariannu a gweithredu gwasanaethau sonograffeg, argaeledd cardiotocograffeg cyfrifiadurol (cCTG), profion Factor Twf y Brych (PLGF) mewn achosion tybiedig o gyneclampsia a ffibronectin meintiol y ffetws, i amlapio pecyn gofal PERIPrem (Rhagoriaeth Amenedigol i Leihau Anafiadau mewn Genedigaeth Gynamserol) Cymru.

#### BLAENORIAETH ALLWEDDOL:

Dylid adolygu ac optimeiddio modelau parhad o ran gofal byd wreigiaeth.

### 6. Cefnogi teuluoedd er mwyn iddynt allu aros gyda'i gilydd

#### BLAENORIAETH ALLWEDDOL:

Mae cadw teuluoedd gyda'i gilydd yn golygu gweithio i osgoi derbyniadau diangen, cefnogi teuluoedd pan fydd baban yn cael ei dderbyn, a gweithredu modelau sy'n galluogi gofal yn y cartref yn y gymuned.

#### BLAENORIAETH ALLWEDDOL:

Buddsoddi mewn Gofal Trosiannol ym mhob uned famolaeth, sy'n cyd-fynd â safonau cenedlaethol.

### 7. Gwella safonau clinigol a chanlyniadau i fabanod ar ddechrau bywyd.

Gofal newyddenedigol ar sail tystiolaeth gyda'r nod o leihau marwolaethau ac afiachusrwydd drwy:

#### BLAENORIAETH ALLWEDDOL:

gwneud y mwyafrif o fwydo ar y fron a'i gynnal, yn enwedig ar gyfer babanod ar unedau newyddenedigol,

#### BLAENORIAETH ALLWEDDOL:

mynd i'r afael â heintiau a

#### BLAENORIAETH ALLWEDDOL:

mynd i'r afael â mesurau sy'n lleihau clefyd cronig yr ysgyfaint.

### 8. Gofal profedigaeth

Mae rhai teuluoedd yn profi marw-enedigaeth neu farwolaeth baban yn fuan ar ôl cael ei eni. Yn ogystal â gweithio i wella canlyniadau mamolaeth a newyddenedigol, sicrhau bod teuluoedd yn cael eu cefnogi drwy brofedigaeth.

#### BLAENORIAETH ALLWEDDOL:

GIG Cymru i weithredu'r Llwybr Cenedlaethol ar gyfer Gofal mewn Profedigaeth.

Dim ond rhan o'r daith i sicrhau gwasanaethau diogel ac effeithiol o ansawdd uchel i fenywod a'u babanod ledled Cymru yw'r prif flaenoriaethau hyn. Nid yw'r holl flaenoriaethau eraill yn llai pwysig o bell ffordd ac mae'n hanfodol eu hystyried ar lefel leol a chenedlaethol er mwyn ysgogi canlyniadau gwell i deuluoedd ledled Cymru.

### 9. Strwythurau llywodraethu clinigol

#### BLAENORIAETH ALLWEDDOL:

Safoni rolau llywodraethu o fewn gwasanaethau mamolaeth a newyddenedigol, gyda goruchwyliaeth uwch a chydweithio wedi'i optimeiddio ag adrannau gwella ansawdd.

#### BLAENORIAETH ALLWEDDOL:

Safoni dangosfyrddau gwylidwriaeth ansawdd amenedigol lleol i alluogi gweithgaredd amser realmesur a monitro canlyniadau i gefnogi gwelliannau lleol.

#### BLAENORIAETH ALLWEDDOL:

Alinio meysydd Datix GIG Cymru ag Offer Sbarduno cenedlaethol cytunedig a dadansoddi data ar lefel Bwrdd lechyd ac ar lefel genedlaethol i nodi themâu ac arwain gwelliant parhaus.

#### BLAENORIAETH ALLWEDDOL:

Comisiynu adolygiad annibynnol allanol ar gyfer pob achos o farwolaeth mamau; marw-enedigaeth intrapartum cyfnod llawn; marwolaeth newyddenedigol cynnar >37 wythnos; ac anaf i'r ymennydd amenedigol.

### 10. Cyd-gynllunio gwasanaethau mamolaeth a newyddenedigol yn strategol

Gan fod gwasanaethau mamolaeth a newyddenedigol yn gyd-ddibynnol, mae'n bwysig bod adolygiadau o gynllunio gwasanaethau a chyllid yn cael eu cynnal ar y cyd.

#### BLAENORIAETH ALLWEDDOL:

Dylid cydgysylltu gwaith cynllunio strategol a chomisiynu gwasanaethau mamolaeth a newyddenedigol 'o got i gymuned' a chynnwys cynrychiolaeth o blith holl aelodau'r tîm amenedigol.